

Nunatsinni atuarfinnut namminersortunut aningaasatigut tapiissuteqartannginnissamut Naalakkersuisut inatsisissatut siunnersuummik suliaqaqqullugit Inatsisartut aalajangiiffigissaattut siunnersuut. Inatsisissatut siunnersuut kingusinnerpaamik UKA2026-mi saqqummiunneqassaaq.

(Inatsisartunut ilaasortaq Kuno Fencker, Naleraq)

Akisssuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut Inatsisartunut ilaasortap Kuno Fenckerip Kalaallit Nunaanni atuarfiit namminersortut pisortanit tapiiffigineqartarnerisa atorunnarsinneqarnissaanik aalajangiussassatut siunnersuutaa misissorpaat. Tunngaviusumik atuarfiit namminersortitat angerlarsimaffimmilu atuartaaneq il.il. pillugit Inatsisartut inatsisaat naapertorlugu Naalakkersuisut isumaqarput siunnersuut manna tunngaviusumik atuarfinnut namminersortitanut tunngasuusoq, taamaattumillu akissuteqaammi matumani taaguut tunngaviusumik atuarfiit namminersortitat atorneqarpoq. Tunngaviusumik aturfik namminersortoq, aammattaaq aturfimmik namminersortitamik taaneqartartoq, inatsit naapertorlugu imminut pigisussaavoq. Soorlu tamanna isumaqarpoq aturfik siulersuisunit ingerlanneqassasoq, aammalu aturfuup suliani aningaasanik akissarsiorfigissanngikkai.

Naalakkersuisut siunnersuuteqartup meeqqat aturfiaata nukittorsarneqarnissaanik kissaatigissaa isumaqatigivaat.

Siullermik Naalakkersuisut sinnerlugit erseqqissaatigerusuppara, kiffaanngissuseqarluni aturfimmik toqqaasarneq inuiaqatigiinni tunngaviusumik naleqartuummat. Angajoqqaat aturfimmik meeqqaminnut tulluarnepaajusumik toqqaqarnissaminnut piviusunik periarfissaqartariaqarput. Kiffaanngissuseqarluni aturfimmik toqqaasarneq ima paasineqassaaq, kommuniniit tapiissutit meeraq malittassagaat, aturfimmik toqqaqarneq apeqqutaatinnagu. Tassa imaappoq pisortat aningaasaliisarnerat aturfimmut aalajangersimasumut tunngatinneqarneq ajorpoq, atuartulli atuartuunerannut. Naalakkersuisut taamatut aqqissuussinerup attatiinneqarnissaa pingaartitarilluinnarpaat, tamatumami angajoqqaat kiffaanngissuseqarlutik toqqaasinnaanerat aammalu assigiissumik ilinniarfinnut isersinnaaneq qulakkeermagit. Aturfii namminersortut tapiissuteqarfigineqannginnermik kingunerisaanik matussappata, kiffaanngissuseqarluni toqqaasinnaaneq taanna annertuumik killilerneqassaaq.

Tunngaviusumik aturfinnut namminersortitanut pisortat tapiissuteqartarnerat atorunnaarsinneqassappat, angajoqqaat aturfinnut taakkununga akiliisarnerat annertuumik qaffariaateqartussaassaaq. Tamatuma kingunerisaanik tunngaviusumik aturfii namminersortitat, soorlu Nuuk Internationale Friskole, matusariaqalersinnaapput, isumaqarnarmat ilaqutariit ilaat akiliinissaminnut akissaqarunnaartussaassasut. Ineriartorneq taama ittoq isumaqarpoq atuartut 200-it missaata tungaannut amerlasusillit taarsiullugu kommunit meeqqat aturfuutaanni atuartuulertariaqassasut. Nuummi meeqqat aturfii

inissaalatserperput, klassit angisuujupput isumalluutigullu unamminartuuteqarlutik, taamaattumillu meeqqat atuarfiannik tatisimaarinninneq annertuseriartussaassaaq – pitsaassutsimut aammalu atuartut atuartitsisullu atugarissaarnerannut innarliissutaasumik.

Pisortat tunngaviusumik atuarfinnut namminersortitanut tapiissutiminnik atorunnaarsitsinerisa aamma kingunerisinnaavaa, taamaallaat ilaqutariit aningaasarsiornikkut inissisimalluartut meeqqaminnut tunngaviusumik atuarfimmik namminersortitamik toqqaanissaminnut periarfissaqalissasut. Tamatuma ilinniartitaanerni inooqatigiinnikkut naligiinnginneq annikillisissanngilaa, akerlianilli annertusisittussaavaa.

Naggataatigut Naalakkersuisut isumaqarput pitsaasuussasoq atuarfiit misilittakkaminnik angusaminnillu imminnut ilinniarfigeqatigiippata, tamannalu kommunini meeqqat atuarfiinut tunngaviusumillu atuarfinnut namminersortitanut atuuppoq. Assersuutigalugu Nuuk Internationale Friskolep ilaatigut atuartitsinerimi periutsinik angusanillu misilittagai meeqqat atuarfiata ineriartortinneranut nukittorsarneranullu atorneqarsinnaapput. Paarlattuanillu aamma pisoqarsinnaavoq.

Taakkua tunngavilersuutigalugit Naalakkersuisut isumaqarput tunngaviusumik atuarfimmik toqqaasimaneq peqqutigalugu meeqqat aalajangersimasut atuarnernut tapiissutinik piianeq ajornartorsiutinik amerlanernik pilersitsissasoq, ajornartorsiutinik aaqqiissutaanani. Meeqqat atuarfiannik tatisimaarinninneq annertusissaaq, inooqatigiinnikkut naligiinnginneq annertusissaaq aammalu kiffaanngissuseqarluni atuarfissamik toqqaasarneq annikillisissallugu. Taamaattumik Naalakkersuisut siunnersuutip akuerineqannginnissaa inassutigivaat.